

RECORDANDO E 30 AÑA DI FAYECIMIENTO DI JUAN ENRIQUE IRAUSQUIN

ORANJESTAD(AAN) -- En coneccion cu e 30 aña di fayecimento di Juan Enrique Irausquin, conocido ciudadano politico y estadista Arubano, PPA a duna DIARIO su biografia pa publica pa asina pueblo conoce su storia.

Juan Enrique Irausquin q.e.p.d. a nace na Aruba dia 3 di December 1904.

Despues di a termina su estudionan di lagere school na Aruba, el a bay Curaçao na unda durante varios aña el a sigui diferente cursonan den accounting, money y banking atravez di un instituto Americano.

Na edad jong, esta di 14 aña el a drenta servicio di Hollandse Bank como office-boy. Den un tempo relativamente cortico el a yega te na procuratiehouder.

Impulsa pa un ambicion di superacion Juan Enrique Irausquin na 1929 a tuma retiro for di Hollandse Bank y a drenta servicio di e firma John G. Eman, cu durante algun tempo tabata haci negoshinan bancario.

El a bira un di e fundadornan di John E. Eman Bank. Na 1936 e firma John G. Eman den cooperacion cu Maduro & Curiels Bank N.V.

a dicidi di funda e promer banco na Aruba, Aruba Bank N.V.

Juancho - manera popularmente señor Irausquin tabata conoci- a bira director di e banco aki, puesto cu el a keda ocupa te na 1951, ora cu el a laga e puesto aki pa dedica su mes na politica.

Juan Enrique Irausquin tabata activo ariba hopi tereno. E tabata presidente di Camara di Comercio, di e comision di turismo, miembro di hopi comision economico, co-fundador di Rotary Club y Home Building Foundation na Aruba, actualmente yama Volkskrediet Bank.

Na 1947 el a bira miembro di Staten y despues di esaki el a worde reeligi como tal den un eleccion cu a tuma lugar. Varios biaha el a worde nombra presidente di Staten como reconocimiento pa su capacidatnan Parlamentario.

Desde 1948 el a participa na tur conferencia importante en coneccion cu autonomia pa Antiyas y reconstruccion di Reino Hulandes.

E tabata forma parti di e Ronde Tafel Conferentie y e asina yama Kleine Commissie.

Na 1949 Juan Enrique Irausquin a funda Partido Pa-

triotico Arubano (PPA).

Ya un aña despues el a gana dos asiento den eleccion pa Staten.

Na 1951, tempo cu e promer eleccion di Eilandsraad a worde teni, el a worde eligi, kedando miembro di e organismo aki durante varios aña y desplegando un oposicion, cu jamas a worde iguala den historia di Aruba.

Resultado di esaki tabata 15 asiento den Eilandsraad di Aruba. Dia promer di April 1956 el a ingresa den Consejo di Ministro como Ministro di Finanzas y Fomento, puesto importante cu el a keda ocupa te na su morto riba 20 di Juni 1962 na hospital St. Elizabeth na Curaçao pa 7.30 or di anochi.

Den reconocimiento pa su hopi meritonan riba tereno politico, economico y social, Su Mahestad Reina Juliana a haya bon di nombre Officier den Orde van Oranje Nassau.

Juan Enrique Irausquin ta worde reconoci como un gran luchador, cu tabatin parti activo den e desaroyo economico di Antiyas Hulandes y en especial e desaroyo economico di Aruba.

Ariba e tereno aki el a laga su stempel indiscutible. Amigonan tanto paden como pa-

for di partido a deposita confianza den dje, na momento cu enemigonan politico tabata haci bofon di su ideanan.

Den e luz aki por menciona e planta di awa y electricidad, WEB cu gracias na su empeño incansable a worde expande.

Door di e awa y electricidad cu e planta di Balashi por a ofrece, tabata posible pa atrae na Aruba e planta quimico, Antilles Chemical Company y desaroya hotelnan.

E caretera banda di e playanan, cu dentro di poco lo hiba su number, a goza di atencion incansable. E planificacion di un hospital moderno etc.

Promotor di un era nobo di e industria di turismo, bao di su insistencia hotelnan a worde traha na e beachnan pa asina inicia un segundo pilar di economia pa e isla.

Tur esaki den un tempo cu masha hopi habitante tin duda si esaki esta turismo tabata un alternativa pa Aruba.

Juancho Irausquin a keda para ariba cu Aruba tabatin mester di un segundo pilar economico pa por salba economia Arubano si un dia e

industria di Lago lo mester cera su portanan.

Na 1984/85 e periodo cu Juancho Irausquin q.e.p.d. a visualisa a yega y ora Lago a cera su portanan ta hustamente e industria di turismo di Juancho a sala e isla Aruba comprobando e vision di Juan Enrique Irausquin.

Distancianan largo el a sa di haci cortico habiendo asina e posibilidad pa e hubentud por goza di estudionan den exterior. Ariba tereno social el a introduci pensioen di viejez, viuda y huerfano.

Juan Irausquin tabata casa cu Maria Waizberg. Su number, labor, actitud, caracter, su sentimentonan pa problemanan di e ser humano den comunidad y mucho mas a hibe den tur skina di Aruba. E tabata un homber recto, di caracter serio, cu awe te ainda ta dificil pa haya otro pilar mescos.

Ta pesey ariba su estatua tin e palabranan SIRBIDOR DI PUEBLO.

DIARIO

22207 - 35026